

## NA WAHINE HAWAII.

He mea nui ka wahine iwaena o na mea a ke Akua i hana'i. Hemahema loa ke kane ke ole ka wahine; aole no e laha na kanaka, aole kanaka o ka aina ke ole ka wahine. Ma ua hoi i nui ka naauao a me ka maemae, a me ka hana maikai a na wahine, malaila kahi noho pomaikai o na kanaka; kuonono loa. No ka mea, ma ka maikai o na wahine, ua maikai no hoi na keiki; ua aq pono ia, a ua hoolohe, a ua maa i ka malama pono. Maluhia no hojka aina i na wahine maikai, no ko lakou ao-pui ana i na keiki e noho malie, a kanaka makua, noho malie no.

Nolaila, he mea nui ke ao aku i na wahine a maikai lakou; ike, akamai i ka noonoo, a akamai hoi i ka hana, a maemae na kinohu a me na naau.

I kuu ike ana nae, nui ka hemahema o na wahine Hawaii. Komo au iloko o na hale, nana au i na wahine, he pelapela ke kino, aole kuonono ka lauoho, a me kahi lole aole maemae. Pela no hoi ka hale, he pelapela, huikau kela mea keia mea o ka hale. O ka ka wahine hana ia, o ka malama i ka hale, a maemae. Eia nae paha ka hewa nui, o ka noho wale o na wahine; aole hana ma ka lima, moe wale no i ka moena. Ina he wahi hana uuku, pau koke no, a o ka noho wale no ia. Oia ka mea e ino ai. Aole pela na wahine o na aina naauao, i ao-pono ia. Ua pau na lima i ka hana, e like me ka olelo a Solomon; e humuhumu ana, e milo ana, e malama keiki ana, e hoomaemae hale ana, e hooloholu palapala ana, e ao kula ana, a pela aku. Nolaila, ua lako, ua kuonono, na palekaua, ua oluolu ka noho ana. Aole lilo nui na wahine o ia ano i ke kolohe, e loa i ke ola. Ua ola na ma ka lakou hana iho. Makehewa ka hoowalewale ia wahine; hana hewa no ke dala; ua loa no ke dala ma kona akamai i ka hana.

Ua maemae hoi ke kino a me ka hale o ia wahine naauao, a makemake loa kana kane ia ia. Aole lilo ka manao o ke kane i ka wahine e no ka mea, he wahine maikai kana. Pauole loa kona naau i kana wahine. Aole hele nui aku ia kane ia nei, manuli o kela mea keia mea; no ka mea, ua pili kona naau i kana wahine, a makemake hoi oia e noho pu me ia. Pela no hoi na keiki, pili ia ia, no kona ano oluolu, a me ke aloha. Ina he ino ka wahine, he kuhu ia e hewa ai ke kane a me na keiki.

## WAHINE MAKE I KE KAAWE.

Na ka Hae Hawaii:

ALOHA OE:—Eia kekahi mea hou e pono ke hai ia iloko ou, a e hiki ke ike maopopoia ke koena naauao.

Ma ka po o ka la 26 o Feberuari iho nei, ua make loa kekahi kaikanahine i ka weia ia iho. I ka puka ana o ka wahine malalo oia po, ua olelo aku ke kane ia ia, e hele pu

laua i ke okioki inigo ma ko laua wahi mahi ana, aka, aole oia i ae e hele pu, moe no ia ma ka hale, oia wale no.

I ka hoi ana mai a ke kane i kela po, e ku aku ana kana wahine ma ka puka, a lalau aku oia, ua make, a ua paa i ke kapla ma kona puu, a e lewa ana oia ilalo, a wehe ia kona kino, aole ona hane iloko ona.

Ua ike ka lehulehu ma ia mau hale i ke kino make i kaawe ia, aka, aole ike ia ke kumu o kela kaawe ana ia ia iho. Ua hele no keia kaikanahine i ke kula, a ua noho pu no ma kahi o ke aoia, aka, aole paha i komo loa ka malamalama ma kona naau.

Ua pouli maoli e like me na ana o ka honua i ke awakea. E ka poe e ike ana i keia he naupou maoli keia, e like me ko na aina Pegani a pau. Mai ke diabololo mai keia manao o keia wahine e lawe i kona ola me kona lima iho: Auwe ka naupou!!

G. W. KEALOHANUI.

Koloa, Malaki 6, 1856.

## KANAKA OKI PUU.

I ka la 24 o Feb. i hala ae nei, ua hookomo ia mai iloko o ka halepaahao kekahi kanaka oki puu. Eia ke kumu o ke oki ana o kona puu: He kanaka kumakahi oia me Ceo, C—; ua haalele pinepine oia i ka hana a kana haku. Kii ka luna ia ia, a loa, a hoolo kela; aole hele i ka hana, a i mai oia "Ina e kii hou mai oe ia'u e hopu, alaila pau kuu ola i keia ia." Kii kou aku ka luna ia ia, a ike ua Keo nei ia ia, ka hoomakaukau no ia i ka pahi, hopu ka luna i kona mau lima, a umeume laua, lilo ka pahi i ka luna, aka, ua moku ka auwai o Keo. Hoopaa ka luna i kona mau lima i ke kaula a lawe i ka lunakanawai, ka paa no ia i ke halepaahao.

S. R. KAPUHU, Lunapaahao.

Nawiliwili, Mar. 4, 1856.

## NO NA HALE KULA HOU.

Makemake paha kekahi poe e ike maopopo i ka nui o ke dala lilo i ka hana ana i ka hale kula hou, a me ka papa, laau, kui, kela mea keia mea. Eia no:

O ka loihio o ka hale,	24 kapuai.
" laula,	16 "
" kiekie o ke pou,	8 "
I puka makani a me hookahi puka komo,	800 kap.
O ka laau,	\$30 00
O ka papa hele,	400 "
" aoao,	800 "
Ina he papa pili, 5 kausani,	50 00
Me ka papa,	300 "
O na kui, 50 paona,	10 00
Laka me na mea liilii,	5 09
No ka hana,	6 50
" lawe ana i keia mau mea,	35 00
	15 00
Huipua a pau,	\$197 50

## KE ALOHA NUI O NA KANAKA HAWAII I NA KEIKI ILIO O LAKOU.

"I keia mau makahiki i hala aku nei, e hele ana kekahi poe e makaiakai ia Hawaii. Hele lakou ma na wahi uliuli o Hamakua, a no ka pakikika a me ka palipali o ke alanui, haalele lakou i na lio, a hele wawae. Ina i hiki lakou ma na muluwai nui, aole lakou e ku a e paje me na wai hohonu olaila, aka, o ko lakou au no ia me ka makau ole e like me ke koa.

I kekahi la o ko lakou hele ana, haawai

lakou me kekahi muluwai, wai kahe ikaika, au aku la kekahi o lakou, noho kekahi e nana ia lakou, akaaka aku la kela, no ka lilo o lakou i ke au. A hele mai kekahi wahine me ke keiki ma ka lima, a au ma ka wai; aka, haule ke keiki a lilo kona kino i ka wai ikaika. Lele aku la kekahi o ua poe makai-kui nei, a hopu i ke keiki, i ole ia e make, a i ka wehe ana o ka lole, loa kela i ka ilio. Huhu loa kela, a kiola ino i ka ilio ma ka pohaku, a henehene ikaika loa i ka wahine, no kona malama pela i ka holoholona lapuwale, pupuka, ino loa. Nui loa ka akaaka o ka poe ma kekahi aoao, no ka luhi o keia kanaka hoopakele ilio.

Nui loa ke aloha o na kanaka Hawaii i na ilio o lakou. Manao au, ina haule pu kekahi keiki uuku me ka ilio iloko o ke kai, lele mua ka makuahine i ka ilio, a mahope i ke keiki. Heaha la ka pono o na ilio keko?

Ina makemake oukou e hoopau i ka ola o kekahi hapa o ko oukou mau ilio, alaila e lawe mai ia'u, nau e pepehi

Y.

## HE KANIKAU ALOHA NO L. KAHUAKAI.

Aloha kuu hoa o kuu pau pili,  
Kuu hoa o ka malu o ka ulu,  
O ke ahe a ka makani he aa, [Lihau,  
Kuu hoa o ka pii'na o Paupau a me na Lehua o  
Kuu hoa o ka nalu o uo, a me ka wai o Kapoulu,  
Aloha kuu hoa o ka hono o na moku,  
Moku kuu e ke hoa la Kaawale ae,  
Kaawale hoi au me ka u me ka pau make ia oe, ea.  
Kuu hoa pili o kuu me ka makani,  
Kuu hoa o ka la wela o Kamaomao,  
Kela kula panof a kuu e hele ai;  
Kuu hoa pupuu anu o Kamaohe,  
Mahana aku kuu i ko aloha;  
I ko pane ana mai, huli mai kuu he wahi ana keia.  
Aloha kuu hoa o kuu Ualena, [ea.  
Ke hapai ia maila e ka Hoolua,  
Efua kuu i ke anu a ke Kiowao.  
Kuu hoa o ka malu Kuawa,  
O ka makani anu he Kilioopu.  
Kuu hoa o ka pii'na ikiiki o Puuhele;  
Hele aku la oe i ka huakai, hoi ole mai,  
Noho au me ka u me ka Paumske ia ae—ea.  
Aloha kuu hoa o ka laula o Kapaa,  
A me ka nani o ke Kalukalu o ke wa.  
Kuu hoa o ka puu hoolana i ka wai;  
He waiwai nui ka'u e malama nei;  
Eia nei o ke Kuluuamoe;  
O ko leo i ka pane apa mai, malaila aku au.  
Aloha kuu hoa o ka ua he Paupua,  
Ke hii ia aela e Kalanipuu,  
E ka noe anu a Kawaiohia—ea.  
Aloha kuu hoa o na Hala o Holia,  
Ke lei ia maila i luna o Haupu,  
I ka wai anu la e Kemamo.  
Kuu hoa o ka wai ula ili ahi,  
O ke kula wela la o Waiolono,  
O kela kaha ai ole a Kuu e hele ai,  
Hookahi no ai he aloha,  
Inai pu no me ka waimaka,  
Kuu hoa o ka makani he Lawakua,  
E welo ana ma ka pali i makuaiiki,  
E Kuehu ana ke Kupa i ka Momoku,  
E kuni ana i ka ili o Kaipohi,  
He ahi ke aloha i ke kanaka ke hiki mai  
He haawe kaumaha ia i kuu manawa—ea.  
Aloha kuu hoa o ke one o Hoolia,  
Ona ohia o Kupa'koili,  
Ke ai ia maila o na keiki a Naiwi,  
E waha ana ma ka pali o Makau,  
Hala aku la oe i ka noe anu a Kukaopua,  
Noho au me ka u me ka pau make ia ae—ea.  
Aloha kuu hoa kuu o ka po me ke ao,  
Kuu hoa o ka ai Haahoe o ka aina,  
O ke koekoe anu o ka Waikoloa,  
Ehikikii ana i ke kula o Kokoloea,  
Ea maole i ke poi a ke kai,  
Ehehe ka pu i na po e wa—ea.

J. H. KAUWAEPA.

Kawihona Hale, Honolulu, Feb. 8, 1856.